

ած էին սեիդներից, որոնք գործում էին, ինչ որ կամենում էին: Աշխարհի դատարանները պատժի ենթարկել նրանց չէին կարող. ստոր մահկանացուն իրաւունք չունէր դատել երկնքի որդիներին, եւ դրա համար սեիդներն անձնատուր էին եղած իրանց անսանձ կամայականութեանը: Այս ընդհանրապէս սարսափում եմ ես, երբ մտաբերում եմ այն բոլոր չարագործութիւնները, որ անում էին այդ անիրաւները. որքա՛ն ակերմունքի, որքա՛ն արեան, որքա՛ն ընտանիքների աղբատութեան պատճառ էին դառնում նրանք...

Ատրպատականը Պարսկաստանի մէկ մասն էր, բայց նա իբրեւ ֆեոդալական երկիր (մուքը թաւախֆ), բաժանոած էր զանազան խաների, բեկերի, շահզադաների եւ այլ ազնուական տների մէջ: Նրանք, կոչւում էին աղաներ: Աղաները համարւում էին բարձրագոյն դաս կամ շահի վասալներ: Բացի աղաներից, կալոածական բաժիններ ունէին մեծ մօլլաները, որպէս հոգեւորականութեան ներկայացուցիչներ եւ սեիդներ, որպէս մեծ մարգարէի որդիներ: Վասալները երբեմն վճարում էին շահին իրանց կալոածների հասոյթից մասնաւոր տուրք, պատերազմի ժամանակ օգնում էին նրան, իսկ շատ անգամ, ապստամբելով, ոչ առաջին պարտաւորութիւնն էին կատարում եւ ոչ վերջինը: Քիչ չէր պատահում, որ նոյնիսկ խաները, բեկերը, շահզադաները միմեանց դէմ պատերազմ էին յարուցանում, յարձակւում էին միմեանց երկրի վրայ, ակերում էին, հրդեհում էին, թալանում էին եւ գերիներ էին տանում: Գերին նրանց համար նոյնպէս մի ապրանք էր, որպէս տնային կայքը, որովհետեւ յետոյ վերադարձնում էին, նրա փոխարէն փրկանք ստանալով: Այս պատճառով կռիւր եւ թշնամական յարաբերութիւնը ֆեոդալական իշխանների մէջ մնում էին անխզելի:

Եւ այսպէս, բոլոր գիւղորայքը բաժանոած էին աղաների մէջ. շատ տեղ մի գիւղը ուներ մի քանի աղաներ: Բայց թէ կառավարութեան ձեւը, թէ աղաների յարաբերութիւնները կամ նրանց պայմանները գիւղացիների հետ այստեղ այնպէս չէին, ինչպէս որ էր Վասպուրականի եւ Տարօսի նահանգներում, ուր տիրապետում էին քրդերը: Ատրպատականում աղան համարւում էր կալոածատեր: Յողը — մի ժամանակ նրան շահից շնորհոած, որպէս աղբիւր իր վասալի ապրուստը բաւականացնելու սերունդից սերունդ անցնելով եւ պատմական փոփոխութիւնների պատճառով, — դարձել էր նրա սեփականութիւն: Նա իրաւունք ուներ գրաւ դնելու իր հողը, վաճառելու եւ ամեն կերպ նրանից շահուելու: Բայց քրդերը կալոածատերեր չէին. նրանց մէջ աղաներից մէկը սեփականացնում էր սրի ուժով մի կտոր հող, միւս աղան, ակելի զօրեղ գտնուելով, խլում էր նրա ձեռքից, եւ այսպէս հողը անդադար անցնում էր մի աղայից դէպի միւսը: